

Venetorum animi, pacem cum Carrario Principe Alberti Æstensis arbitrio tentarunt, missique ad hoc Fædericus Cornarius & Pyrrinus Rota, hic illius procurator, Venetus vero compater, veterique familiaritate conjunctus: sed ab eo ut causam susciperet, nullo modo impetrari potuit: usque adeo tunc omnium vicinorum animi odio in Venetos flagrabant. Et quia fama erat, ingentem vim bellicorum operum Paduæ per eos dies comparatam, atque curribus impositam, confestim Venetus circa Musionis ripas, per quem Mestram navigatur, aliquot munitiones statuit, ratus omnes hostium conatus ad id unum spectare, ut Mestram subita aliqua vi opprimerent. Sed illorum consilia diversa: siquidem Carrarius Novale adortus, summa ope locum oppugnare cœpit: rescissisque circa Mogianum aggeribus, qua patebat Taurisum iter, validoque præsidio ad rupturam imposito, omnem Veneti auxilii spem Taurisinis ademit. Qui in urbe erant, audita ad Liopoldum Ducem legatione (constans enim fama erat, ad id Pantaleonem Barbum missum, ut Taurisum cum suis finibus barbaro traderet) quia & ipsi plures menses nullum acceperant stipendium, veriti ne ipsa rerum mutatione, sua mercede fraudarentur, omnium militum causam Boratio Malaspinæ, viro impigro, tuendam demandant. In ejus verba jurant omnes, rata se habituros fœdera, inducias, bellum, pacem, ac denique omnia, quæ vir ille pepigisset: sumpturos se arma illius jussu, ejusdem jussu deposituros: pergeret modo susceptam causam tueri, atque ita efficere, ne frustra tot pericula & labores perpeffi viderentur. Ille vero, ut prudenti erat ingenio, cum omnibus fere, qui ordinem ducebant, ad Venetos magistratus venit. Erat Leonardus Dandulus urbis Præfectus, Marcus Zenus Prætor, Legatus Andreas Venerius: quos ille ita coram allocutus dicitur: *Constans fama est, viri Veneti, Principem & Patres ad Liopoldum Austriae Ducem misisse, qui ei Taurisum cum suis finibus publico nomine traderet: quod munus, nisi ille stultus est, haud quidem aspernabitur. Amplectetur, quis nescit? vestram munifi-*

*Taurisini
præsidii se-
ditio.*